

Na osnovu člana 26. i 28. stav (1) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst, 37/14 - Ispravka), a u vezi sa članom 20a. stav (4) Zakona o radu ("Službene novine Federacije BiH", br. 26/16 i 89/18), Vlada Kantona Sarajevo, na 19. sjednici održanoj 10.05.2019. godine, donijela je

### UREDBU

#### O IZMJENAMA I DOPUNI UREDBE O POSTUPKU PRIJEMA U RADNI ODNOS U ZAVODIMA, AGENCIJAMA, DIREKCIJAMA I UPRAVNIM ORGANIZACIJAMA, PRAVNIM LICIMA S JAVNIM OVLAŠTENJIMA NA TERITORIJI KANTONA, GRADA ILI OPĆINE, U JAVNIM USTANOVAMA I JAVNIM PREDUZEĆIMA ČIJI SU OSNIVAČI KANTON, GRAD ILI OPĆINA, TE U PRIVREDNIM DRUŠTVIMA U KOJIMA KANTON, GRAD ILI OPĆINA UČESTVUJU SA VIŠE OD 50% UKUPNOG KAPITALA

##### Član 1.

(Dopuna člana 12.)

- (1) U Uredbi o postupku prijema u radni odnos u zavodima, agencijama, direkcijama i upravnim organizacijama, pravnim licima s javnim ovlaštenjima na teritoriji kantona, grada ili općine, u javnim ustanovama i javnim preduzećima čiji su osnivači kanton, grad ili općina, te u privrednim društvima u kojima kanton, grad ili općina učestvuju sa više od 50% ukupnog kapitala ("Službene novine Kantona Sarajevo", broj 9/19) u članu 12. iza stava (3), dodaje se stav (4) koji glasi:

"(4) Izuzetno, u javnim ustanovama iz oblasti kulture, umjesto pismenog, usmenog i praktičnog ispita, provodit će se audicija."

- (2) Dosadašnji st. (4) i (5), postaju st. (5) i (6).

##### Član 2.

(Izmjena člana 13.)

U članu 13. stav (4) riječ: "prijave" zamjenjuje se sa riječi: "izjave".

##### Član 3.

(Izmjene člana 19.)

- (1) U članu 19. stav (1) u tač. d) riječi: "članu 9. stav (2)", zamjenjuju se riječima: "članu 8. stav (1)".
- (2) U članu 19. stav (1) tač. e) riječi u zagradi: "član 9. stav (8)", zamjenjuju se riječima: "član 8. stav (7)".

##### Član 4.

(Izmjena člana 21.)

Član 21. mijenja se i glasi:

##### "Član 21.

(Usklađivanje akata)

- (1) Poslodavci iz člana 1. ove uredbe su dužni u roku od 6 mjeseci od dana stupanja na snagu ove uredbe uskladiti svoje akte sa ovom uredbom i dostaviti ih resornom ministarstvu Kantona Sarajevo, odnosno gradonačelniku ili načelniku."
- (2) Do usklađivanja akata iz stava (1) ovog člana, za postupak prijema u radni odnos neposredno se primjenjuju odredbe ove uredbe."

##### Član 5.

(Stupanje na snagu)

Ova Uredba stupa na snagu narednog dana od dana objavljivanja u "Službenim novinama Kantona Sarajevo".

Broj 02-05-19730-32/19  
10. maja 2019. godine  
Sarajevo

Premijer  
Edin Forto, s. r.

Na osnovu člana 2. stav (2) Zakona o objavljivanju propisa i drugih općih akata u "Službenim novinama Kantona Sarajevo" ("Službene novine Kantona Sarajevo", broj 18/11 - Prečišćeni tekst, 36/15 i 11/19) i člana 26. i 28. stav (1) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka), Vlada Kantona Sarajevo na 20. sjednici održanoj 16.05.2019. godine, donijela je

### UREDBU

#### O VRSTI I POSTUPKU OBJAVLJIVANJA PROPISA I JAVNOSTI RADA ORGANA UPRAVE, JAVNIH PREDUZEĆA, JAVNIH USTANOVA I PRAVNIH LICA ČIJI JE OSNIVAČ KANTON SARAJEVO

##### POGLAVLJE I - OPĆE ODREDBE

##### Član 1.

(Predmet)

Ovom uredbom uređuje se vrsta i način objavljivanja propisa i drugih akata koje donose organi uprave, javna preduzeća, javne ustanove i pravna lica čiji je osnivač Kanton Sarajevo, (u daljem tekstu: organi javnog sektora), te način ostvarivanja i obezbjeđivanja javnosti rada organa javnog sektora.

##### Član 2.

(Rodna neutralnost izraza)

Izrazi koji se koriste u ovoj uredbi, a imaju rodno značenje koriste se neutralno i odnose se jednako na muški i ženski rod.

##### POGLAVLJE II - VRSTA I POSTUPAK OBJAVLJIVANJA PROPISA

##### Član 3.

(Propisi i drugi akti)

- (1) Pod propisima i drugim aktima iz člana 1. ove uredbe smatraju se svi akti koji imaju karakter općih akata, a naročito:
  - a) Ustav Kantona Sarajevo;
  - b) zakoni,
  - c) statuti,
  - d) osnivački akti organa javnog sektora,
  - e) uredbe,
  - f) odluke,
  - g) pravilnici, kao provedbeni propisi zakona,
  - h) svi pravilnici koje donose organi javnog sektora iz svoje nadležnosti,
  - i) uputstvo, naredba, instrukcija koja ima karakter općeg akta
  - j) zaključak i
  - k) inicijative.
- (2) Pod pojmom "karakter općeg akta", smatraju se svi propisi koji imaju ili mogu imati utjecaja na javnost (građanstvo, pravna lica i sl.).
- (3) Pored propisa navedenih u stavu (1) ovog člana, objavljuju se i svi drugi akti potpisani sa stranim organizacijama (memorandum i razumijevanju, međusobna saradnja, pomoć i sl.), osim ako to posebnim propisom nije izričito zabranjeno.
- (4) Izuzetno od odredbi ovog člana, organi javnog sektora neće objavljivati propise i druge akte koji su, u skladu sa Zakonom o zaštiti tajnih podataka ("Službeni glasnik BiH", br. 54/05 i 12/09), zaštićeni oznakom tajnosti.

##### Član 4.

(Način objave)

- (1) Shodno odredbama člana 4. Zakona o objavljivanju propisa i drugih općih akata u "Službenim novinama Kantona Sarajevo" ("Službene novine Kantona Sarajevo", broj 18/11 - Prečišćeni tekst, 36/15 i 11/19) (u daljem tekstu: Zakon), svi propisi i drugi akti se objavljuju u "Službenim novinama Kantona Sarajevo".
- (2) Pored obaveze iz stava (1) ovog člana, propisi i drugi akti iz člana 3. ove uredbe, obavezno se objavljuju na službenoj web stranici organa javnog sektora.